

中
州
金
石
攷

物莫壽於金石圖久遠者託焉三代勒銘於鍾
鼎彝器衛孔悝之鼎季武子之鍾抑亦盪矣石
刻之傳寥寥可數秦以後大都樹碑而文之鑄
金者罕焉宋以前文學之士無從事金石遺文
者自劉原父歐陽永叔趙德夫董彥遠諸家相
繼論述而鼎彝古器亦多出政宣之間語其利
益足以訂經注之疎補史傳之闕備小學之考
異乎玩物喪志者也所患歷代綿邈岫嶠禹迹
搜索無有嶧山秦刻久為火焚而好事者善欺

嗜竒者輕信潘吾人迹華山博箭之偽耳食之
徒詫竒願往近代不禁立碑津亭寺廨旋樹旋
仆者徒供敲火礪角之資碑材之可弔多矣其
又足徵信而傳後乎中州古迹最夥玉圃先生
黃公以政理之隙委所屬搜訪按以舊聞精加
辨析錄其有名而不誣者棄其勞費而災石者
又苦僚吏罕素心雅抱視為不急近舉而遐遺
猥以無有報命歉然尚有漏畧之虞嘻推此心
以求芳躅防壅蔽續古道公之政理蓋猶夫是

矣豈但博雅好古云爾哉千古寶器莫重洛邑
九鼎傳三代千八百年一飛入泗八遷入秦後
不知所終遙想三翻六翼之上具一部山海經
古文奇字應聚於斯竟無可考韓文公僅獲石
鼓數十句遂震而矜之恤不編入二雅亦可謂
無聊甚矣金石雖壽終歸磨滅此又不禁茫然
長懷者也常熟陳祖范譔

古迹之勒金石以垂永久者必其事足傳其文可信又有名人精於篆籀者為之表額非苟而已也輒近世所述之事既無關重輕其文其書又不加精擇蕪雜鄙瑣茫無義趣安可望垂永久耶中州自商以後為都會地聖君賢相名世大儒以及騷人逸士僊蹤梵跡凡被諸貞珉見於載籍者惟茲土為最夥傳之既久兵火煨燼洪流淪沒漢代以前無有存者若岵嶁之碑銅駝之銘太師之碣雖撫刻失真而古人遺意猶藉以不泯漢時碑板祇存其七魏晉以降大都模糊斷折不亟為蒐討懼日久益湮爰於休沐之暇劄致郡縣廣事訪葺柰好

古者鮮非其性之所近則視為不急而置之或委諸下吏足跡未踰城闔輒以無存走復甚且長吏虞樞搦費多晦其跡而反加謏蔑焉其以無存告者安知不尚苔封於道左草掩於土中誰得而究其有無耶今就目擊者標識本末餘所未見而耳聞者亦錄以俟後之同志金元以前片石尺碣悉為登入明代石刻最濫郵亭之去思仁祠之施捨其文其書無足比數則屏而不錄攷古證今依各府州編入前賢論列附綴其下訂正其傳聞譌舛者雖不敢云銓敘條理考證精博如集古金石諸錄然觀其標識翫其辨跋已不啻摩挲金石而目了

其文字也已

乾隆辛酉三月上浣北平黃叔璥識

中州金石攷目錄

卷一

開封府

卷二

陳州府

許州府

卷三

歸德府

卷四

彰德府

衛輝府

卷五

懷慶府

卷六

河南府

卷七

河南府二

陝州

卷八

南陽府

汝寧府

光州

汝州

中州金石攷目錄

中州金石攷卷一

北平黃叔璥玉圃輯

開封府

祥符縣

漢尚書令邊韶碑

蔡邕隸書

格古要論邊韶漢桓時大中大夫蔡邕隸書其墓碑在開封府東北五里

太常戴封碑

董襲碑

天下碑錄在開封縣東北蔡前

令史邊讓碑

天下碑錄
在開封縣

唐大相國寺碑

圖畫見開志唐延和元年七月改故建國寺為大相國寺睿宗御書碑額為一絕

東平王寫真院記

天下金石志
在相國寺

汴州安業寺碑

殷仲容書

汴州東西水門記

貞元十四年韓愈撰

貝州司法叅軍李君墓銘

貞元十七年韓愈撰

昌黎文集貞元十七年九月丁卯蘭西李翔合墓其父望祖考貝州司法叅軍楚金望祖妣清河崔氏夫人于汴州開封縣某里

宋東京國子監碑

建隆三年陶穀撰權令詢書

十善業道經要略

唐裴休撰 太平興國二年趙安仁正書
在繁臺塔內

金剛般若波羅蜜經

趙安仁正書
在繁臺塔內

按宋史列傳趙安仁河南洛陽人幼時執筆能大字雍熙二年補梓州推
鹽院判官會國子監刻五經正義板本以安仁善楷書遂奏留書之直集
賢院王使內戚家多以銘誄為託歷官御史中丞
諡文定宋初去唐未遠所書二經猶有唐人遺意

遵等覺禪院記

雍熙元年王嗣宗撰

大相國寺碑

至道二年宋白撰吳鄂書並篆額

兗州山人彙大相國寺碑在大梁為翰林承旨宋白撰待詔鄂書完好若新立
者白亦頗有文學名而辭藝謀不工不敢與江總持作奴何論簡樸鄂雖不能
脫奴侯習頗道勳自

實殆類誠懸集書

張子野墓銘

康定元年

歐陽文忠公集子野諱先其父世博州高唐人
自曾祖已來家京師而葬開封今為開封人也

二體石經易書殘碑 至和元年篆書釋文正書

佩文齋書畫譜宋仁宗至和元年八月十六日己酉以皇姪右屯衛大將軍克勤書國子監石經論語求書石國子監帝從其請命國子監取易詩書周禮禮記春秋孝經為篆隸二體刻石兩盤嘉祐六年國子監言草澤章友直篆石經畢詔補試將作監主簿以同篆石經殿中丞張次立與堂除書目云石經七十五卷楊南仲書周易十書十三詩二十春秋十二禮記二十皆具真篆二體

宣和書譜章友直工玉筋字學

與楊南仲篆石經於國子監

癸辛雜識汴學即昔時太學舊址九經

石版堆積如山一行篆字一行真字

按石經遺字三碑石長五尺四寸寬二尺六寸凡六排各三十六行篆隸相同表裏鑲字剝損過半矣今在府學東廡易二碑升因升革尚大衆節中事小過既濟未濟上繫至繫傳之主也升五爻象貞吉升階時石經作階因五爻利用祭祀石經係宗祀尚書一碑洪範武成旅獒金縢一行康王之誥酒誥石泐不可讀武成第一段淮一曰王長弟元龜龜石經作霸既生魄同二段厥四月哉生明今本在萬姓統宗下三段丁未祀于周廟今本在受命于周下四段既生魄今本在示天下勿服下五段三若曰嗚呼今本在大告武成下六段底商之罪今本在征伐商下七段恭

天成命今本在于小子其承厥志下八段惟爾有神今本在周不率俾下
九段列爵惟五今本在用附我大邑周下按伏生今文尚書無武成至孔
氏古文尚書乃有此篇劉氏王氏程子皆更定次序亦各不同朱子以漢
定日辰及經文前後參考細推始成定本 洪範明作哲石經作斷 酒
誥厥心臧
石經作藏

太尉王文正公神道碑

至和二年歐陽修撰

歐陽文忠公集天禧元年十一月公
薨於開封府開封縣新里鄉大邊村

觀察留後李公墓銘

嘉祐五年歐陽修撰

歐陽文忠公集鎮潼軍節度觀察留後李公諱
端懿開封人也薨開封縣褒親鄉先塋之次

延福宮石銘

王安石撰

江南通志同泰寺石橋吳順義中置千禧院石
四各高丈餘宋政和中取入汴京置延福宮

立朱亥墓銘

蘇軾撰

徽廟御書

政和三年某竹堂碑目徽廟雜書人在開封府學

金汴城東光教寺普賢洞記

皇統四年施宜生撰并書

元河南行省增修堂廡碑記

至元三年吳炳撰

汴梁廟學記

至元庚寅姚燾撰

河南行省左右贊治堂記

至元壬辰許衡撰

河東廉訪使程公神道碑

大德元年王思廉撰

元文類公諱思廉元貞丙申正月以

官薨於太原二月三日歸葬汴梁

梁國公楊澤神道碑

至大三年大學士李謙奉勅撰

程鉅夫楊氏先塋記延祐二年丞相身率僚佐共建新賜神道碑於墓右祠堂
三楹秦國公李孟為榜曰致嚴壙則集賢侍講學士趙孟頫銘之墓前有表表
知政事賈鈞書之墓南石門刻御史中丞郝天挺之字曰楊氏先塋又南華表
雙高國子祭酒劉處題其銜顏曰梁國公神道有碣路左書曰大司徒梁國公

墳則鄂國公

史弼書也

草書千文

至大四年趙孟頫書
在臬司署

河南行省左丞相高公神道碑

延祐三年元明善奉勅撰

元文類公諱興汝南人皇慶二年薨於大梁之路寢詔令汴臣加禮以葬某月
日葬祥符之史湖里延祐三年追封梁國公諡武定命明善撰次神道碑

明東書堂帖

歷代法書集始模刻之多未有甚於此者

金石林時地考周

王臨比二十卷

蘭亭序修禊圖

具有蘭亭史者所謂肥本者趙子固語本也

金石林時地考蘭亭

臨本并圖周王臨

格古要論補永樂十五年周王刻蘭亭序修禊圖并詩文考證其前五序一臨
定武的本一定武肥本一定武瘦本一褚遂良摹本一唐太宗摹賜本圖後自
製跋語其圖益模李伯時所畫而翻白尤多比山陰禊圖稍細密圖後有天台
孫綽後序復有唐柳公權宋朱元章跋語宋高宗行書付孟庚二帖俱乘註宋

高宗御寶又其次有唐太宗得蘭亭二跋及定蘭亭審訣詩歌曹宏父詩又載姜堯章蘭亭備考又載十七帖辨蘭亭旁註僧宇不是曾字之誤末有殿下所跋蘭亭註說識以蘭雪

軒東書堂圖書記二印

辨帖發明宗室周府模刻蘭帖而增入蘭亭敘文并宋人書甚有雅趣近復翻刻其去周刻甚遠矣

回龍廟鐵犀銘

正統十一年于謙撰

閭與邦鐵犀鎮河廟碑記出大梁之安遠門東北隅四里許有四龍廟廟後有鐵犀一狎狎蹲踞半出土上背鑿銘詞題明正統丙寅巡撫于忠肅所鑄以鎮水患者閭賊圖汴曾用萬夫移犀他所千鎗百煥聲聞十里決旬不能損其全軀僅於左脇下穿一穴壬午埋沒土中後人剽地而得之視其銘詞隱隱隆起若商周彝鼎銀鈎無損良有神呵護矣其銘曰百煉玄金鎔爲真液變幻靈犀雄威赫奕道禦隄防波濤求息安若泰山固如磐石水怪潛形馮夷斂跡城府堅完民無墊溺兩順風調男耕女織四時循序百辟効職億萬閭閻指之衽席惟天之休惟帝之力爾亦有庸傳之無極汴人庶吉士袁檐如亦有贊

府學敬一亭碑記

于謙撰

祥符縣學碑記

天順六年劉昌撰

六烈女祠記

正德十年李夢陽撰

庇民祠記

正德十年李夢陽撰

岳忠武祠記

正德丙子何孟春撰

大梁書院記

修相國寺碑

正德十五年

修禹王廟碑

嘉靖元年左國璣正書

五門碑記

嘉靖元年

已上四碑俱李夢陽撰

布袋和尚像贊

嘉靖癸巳張平山繪像李獻吉撰左國璣書

世稱三絕碑

本朝康熙壬申相國寺災石燬郭世寧重鐫

巡撫都御史題名碑記

嘉靖十九年何聘撰

遊梁書院記

天啟二年方大美撰吳士端集緒遂良書今在三程先生祠

睢陽叅知劉煥誅

董其昌書
在臬司署

邵子遺像

下幅刻伯溫先生公清先生二像
在遊梁祠東廡

附

范文正公集宋衛尉少卿分司西京胡令儀神道

碑公陳留人歸葬於開封某鄉某里辨帖箋載石鼓

臨本舊刻宋東都時嘗鑄金填其刻文置宣和殿金

人入汴剔取其金而棄之故自靖康土宇分裂之後

拓本絕不可得池北偶談載孫退谷先生說昔爲祥

符令有人發古墓乃東漢馬武墓妾處中有石即武

爲妾自製誌文甚古字畫精絕又有香奩一具中貯

脂粉皆宛然奩底一小銅印鐫妾莫如三字急就篇
注漢有毛莫如又大梁城西水磨間土人掘地得一
石有日月逝酒漿五字乃古篆也周櫟園侍郎摹勒
以傳謂非仙者不能道也施愚山有詩記之 祥符

令張淑載榻一碑云在府城東十五里宴臺河關王
廟中字奇異不可辨首行殘缺末行似紀年月車全
夆米尖赤子月千迎日尚欠英古阜弋雷巾丑係英
込卅刃余非楷書非八分點畫波磔頗具古意惟月
日不變文精於六書者莫知爲何代何人也西華王
怡亭謂筆法絕類金天會中都統郎君碑此亦金人

書無疑

陳留縣

漢東

一作索

昏庫上里社銘

蔡邕撰

魏何伯申碑

金石林碑地考

在縣東五十里

宋二體石經周禮殘碑

篆書釋文正書

石在縣東二里許如如園佛寺中世今王莽龍通至此寺見町内卧石上
錫周禮詢之僧人云從前買白石工者擬刻去舊篆刻新修廟記因而面
皆字剝蝕太甚難以刮磨遂留之後龍易以他石葺置文廟殿門之北周
禮二面每面六排各三十行上下不相屬正書篆字釋文楷書石長八尺
符石經等寬減三寸一天官惟王建國至宮正徒四十人止凌人至掌舍
府二人止九嬪至縫人女御八人止五曰保庸至八曰山澤之賦止凡邦
之小治至小宰三曰以敘作其事止六曰庶辨至不用濼者止下俱容減
一春官大宗伯若王不與祭祀至小宗伯辨吉凶止牲繫于牢至類造止

亭標用虎囊至加莞席紛紜止大喪存其奠大旅亦如之石經在凡酒修酌下今本在左右玉几下共其玉器至典命凡諸侯之適子止司隸而役之至世婦有祿事于婦人止大司樂掌成均之灋至大合止

附

後漢書蔡邕傳唐章懷太子賢注汴州陳留縣有

邕祖携碑訪碑錄縣北有碑額題漢丞相陳平之碑

杞縣

漢執金吾高褒碑

訪碑錄在雍邱縣南五十里大善鄉

太尉高峻碑

天下碑錄在雍邱縣

外黃貞節先生碑

中平二年蔡邕撰

後漢書范丹中平二年卒何進移書陳留太守果行誨
證會曰宜為貞節先生刺史郡守各為立碑表墓焉

宋空桑廟御製贊碑 大中祥符七年真宗御製口口奉勅刻

宋真宗封泰山東道空桑製贊立碑未幾南渡廟碑墮乳剝崩缺什
無功遺明嘉靖四十年蕪郡陸臣重葺碑陰祀人王嘉言撰記金中斷

大理寺丞龐之道墓銘 嘉祐八年司馬光撰

司馬溫公集弟元英遠之道
之柩葬於雍邱頴公之墓側

元張萬戶城杞碑 至大己酉劉方撰

譙樓記 至正四年楊惠撰

明重修伊尹廟記 弘治丁巳任儀撰

夢阿衡詩教碑記 嘉靖癸丑麻濤撰

通許縣

漢廣武君李左車墓碣

邑志墓在廟後墓前有石方僅二尺文字漫漶可辨者君李左車尾曰斜臨渭水北眺輿山數字

宋咸平縣丞廳醑醑記

熙寧中張耒撰

進學齋記

元祐乙丑張耒撰

金奉直趙君墓碣銘

天興壬辰

尉氏縣

漢西平令楊期碑

天下碑錄在尉氏縣西南四十里三亭鄉楊方村墓南二十步文字磨滅惟有首尾

征西大將軍楊瑾碑

天下碑錄在尉氏縣三亭鄉路村

琅邪王傅蔡朗碑

永興六年蔡邕撰

大復山樵樊翰記邑有斷碑數十字
在尉氏近歲失其傳或即指此碑耶

魏散騎常侍步兵校尉阮嗣宗碑

嵇叔夜撰

唐重建阮嗣宗廟碑

李京撰

尉氏令李良清德碑

天寶五載

宋節度府判官胡晝墓銘

宋祁撰

邑志明弘治年間
農夫鋤地見之

贈尚書員外郎王公墓銘

慶歷四年歐陽修撰

歐陽文忠公集王氏爲開封咸平人公慶歷四年九月庚申葬於尉氏縣城鄉柘子原之新塋

元學士鄭思恭墓碑

至正六年

邑志明嘉靖九年邑令劉創其文
為學宮之用人規鼎履有遺憾焉

附

漢魏碑刻紀存尉氏故吏處士人名殘碑在尉氏
縣按尉氏令鄭季宣碑并陰在山東濟寧州學宮

洧川縣

元洧川尹高弘惠政碑

皇慶元年劉庸撰

重修顏考叔廟碑

至元庚辰梁棟撰
明成化壬寅重刻字不足觀

鄆陵縣

漢豫州從事尹宙碑

熹平六年 熱書
今在縣學

隸辨額題從銘二篆字上有穿額橫書在穿之右金石文字記作豫州從事尹
宙碑云豫字磨滅以其額川人而言本州知其為豫州今碑甚完好無一字磨
滅惟云仕郡歷主簿督郵五官掾功曹守昆陽令州辟從事
而已無豫字也或亭林所見之本傳拓不清以為磨滅爾

碑陰元鄆陵學官李營記石云皇慶元年追封孔子文宣王號立石類宮
鄆陵達魯花赤阿八赤物色碑材得片石於洧川即此碑也公輦致廟廡
另易新石昔皇慶三年正月劉青藜金石錄錄碑
鄆陵因洧水泛漲岸崩而得之似未見碑陰所載也

故民吳仲山碑

燕平元年

金石林特地攷金石志俱載入閭鄉

金石錄漢吳公碑其額題漢故民吳公碑碑云燕平元年十二月
上旬吳公仲山其他刻畫完好如新文詞頗拙陋書亦怪而不工
隸辨字原云在東京今開封府隸釋云宣和中知鄆
陵縣穆延年得之於民間碑無其名仲山其字也

唐立漢文範先生陳君碑

訪碑錄在鄆陵廟內裴延休文

元建宣聖廟記

貞元二年輔淮良撰

明處士牛興墓表

薛瑄撰

附

邑志文範先生祠在縣西漆井村明邑人叅議陳
溥考漢制袞金鑄像立碑二元季兵燬今餘斷石一

中牟縣

魏鍾太傅碑

格古要論鍾繇字元常潁川長社人善書魏封平陽侯碑在尉氏縣西北三十里將城鄉高兼村今屬中牟

按金石志作魏鎮縣碑在將城鄉鎮縣於義無取或偏旁傳寫誤爾

唐潘孝子頌 大歷三年崔偁撰屈突寬八分書

金石錄孝子字季通與其父良援相繼有至行親喪皆廬墓大歷中宣慰使李季卿以聞有詔褒美墳隤在今中牟縣祥符中章聖皇帝西祀汾陰過之諭有司封其墓且禁樵採云

列子觀題名 李德裕王起題

宋智度寺經幢 太平興國三年

修漢中牟令魯太師廟碑 祥符五年魯宗道立

隴蜀餘聞魯肅簡公冬中牟至
縣即立漢令魯恭祠勒傳於碑

義士李冠殘碑

邑志學中標土得五代義士李冠殘碑刻韓忠彥德徽二跋言李以布衣奮義
使賊不犯我境又言六世孫大夫君發揚以傳於後李師德也師德元四年進
士

金延福院淨德禪師塔銘

大定二年董璠撰

清淵五嶽廟碑

大定四年

見子臺大鐘記

泰和甲子張璋撰

元田尹遺愛碑

大德六年王順撰

重修火星堂記

大德十年張舜元撰

汴梁路中牟縣儒學碑

至大四年王鵬遜撰

陽武縣

東魏征虜閭孝侯碑

寶刻叢編天平三年立

唐陽武縣李行忠佛堂記

景雲元年李國微書

陽武復縣記

貞元十九年唐從撰鄭乃中八分書

封邱縣

漢徐州刺史百里嵩碑

邑志百里刺史歷官多善
改今墓及神道碑尚存

陳留太守程封碑

天下碑錄在封邱
縣東二里墓下

魏隱士程冲碑

金石林時地考在縣西南四里
程隱真書 一作程隱夫

節婦白氏碑

金石略在東京節婦白氏碑冲
妻也晉咸熙中建二碑同處

金完顏君用神道碑

邑志完顏君用以武功公追封
卒葬縣境今墓雖廢碑猶存焉

明戶部尚書秦公祠碑

正德時徐繕撰

附

通志翟母碑在縣東漢高祖與項羽戰敗爲翟母
免難之處又土人相傳有唐王伯當碑以爲河淤尚
記其處邑令葉仰高掘十餘丈不得

蘭陽縣

明梁康僖祠記

王輝書

儀封縣

元宋文玉去思碑

至元口年張琬撰

石刻論語

未詳何時

通志縣城西一里許有請見亭亭內
立碑大書論語儀封人請見一章

鄭州

唐尚書庫部郎中鄭君墓銘

韓愈撰

昌黎文集公諱萃長慶元年十
一月葬鄭州廣武原先人之墓

石井闌記

會昌二年李掖書

宋靈顯王贊

大中祥符四年御製并書

後損大甚

欽泰堂記 大中祥符四年祖無擇撰

御賜詩記 至和元年曾公亮撰

宜春令贈太師冀國公神道碑 至和二年歐陽修撰

歐陽文忠公集公程琳父也既罷宜春退居蔡州天聖十年十一月塋鄭州管城縣馬亭鄉之北田村

忠武軍節度使武恭王公神道碑 嘉祐三年歐陽修撰

歐陽文忠公集武恭公諱德用字元輔贈太尉中書令塋於管城明年有詔史臣刻其墓碑

石多殘缺可辨者只百數十字御賜篆額清忠之碑四字尚完好石潤五尺長丈餘又一碑學士韓絳撰文

王彥章畫像記 歐陽修撰

州志記云彥章仕梁為宣武軍節度使以身殉國塋鄭州之管城舊志不載

開元寺碑 張維書

元宣課長官盧君神道碑

至元乙未王惲撰

霍順碑

元明善撰

陳留侯哈丹碑

吳淑撰

明修周列子祠碑

萬歷八年蕪民望撰王藻書

王陽明先生像贊

嘉靖庚申項夢龍刻

州志舊州署有仆碑發視之則先生像也下書嘉靖庚申季冬州牧後學項夢龍刻於仰高臺上書東郭像贊曰門人鄒守益題

蓬萊仙境四大字

未詳何人書

滎陽縣

漢石門二銘

一陽嘉三年

一建寧四年

水經注滎口石門門南漂河有故碑陽嘉三年二月丁丑使河隄謁者王壽賡達河川刊石紀功垂示於後陳留浚儀邊鄙守孝先頌石銘歲遠字多淪缺

漢武帝建寧四年於敖城西北壘石為門以過渠口謂之石門石銘云建寧四年十一月黃腸石也而主吏姓名磨滅不可復識魏太和中又更修之石字尚沒無復存者

漢聞喜長韓仁碑

金石經眼錄銘高六尺闊三尺厚六寸五分字徑一寸五分額字徑二寸五分正大五年出土在滎陽縣署東角門東側西向碑係即任字永即不字丞即王字

右碑不知於何時斷裂篆額漢循吏故聞喜長韓仁第二行十字文內聞喜書蓋石側有隸書跋語此碑出京宗聞樂陽令李侯輔之行縣發地得之字畫宛然劉寬碑書也正大五年十一月廿一日翰林學士趙秉文題

魏石的銘

水經注魏正始三年創建滎陽郡李陽為郡守政有遺惠民為立祠於城北五里許為李君祠廟前有石階階上有石的石的銘具存其略云百族欣戴咸推

聖哉今猶

唐大海佛寺石記

舊唐書榮陽大海佛寺有高祖為隋鄭州刺史日為太宗祈福於此寺造石像一軀凡刊勒十六字以誌之歲久剝缺榮陽令李光慶重加修飾鄭州刺史張仲方再刻石記之以聞

聖德勒石文

輿地碑目在榮州長安三年立韋瓘撰

行淄州司馬鄭府君神道碑

神龍二年張說撰

碑云公諱某榮陽人也神龍二年十月一日葬於榮陽之原

榮陽令盧公清德頌

神龍三年劉穆之撰瑯琊王守質書

中宗賜榮陽令盧正道勅

景龍元年飛白楷書碑後即清德頌

邑志唐盧正道范陽人中宗朝為榮陽令有善政御製贊以褒之碑存縣前真武廟

河東節度使鄭公神道碑

元和八年韓愈撰

榮陽鄭府君夫人博陵崔氏合祔墓銘

大中十二年秦貞撰

銘要記唐鄭恒及妻崔氏誌萬歷初撰出於石門土中其文其書非唐人佳者但以鄭伯常令族與崔夫人淑德當日著會真記者何乃造此掣舌案耶武安志誌銘已著於世多見之者陳仲醇繼儒謂又臺土中自成化間黎陽人得之廢家家居邑之西北五十里曰舊槐縣蓋古之淇澳也後樹之崔氏為香案石若干年有胥識之白於邑長吏邢口因置之邑治其誌始著觀仲醇所記下及武安明萬歷間武令王廷輔謂往陽邑閭生家得誌銘讀之天啟時武令周日強謂發藏於榮陽之原而好古者携之至此遂世為武安有馬如陳說已置縣治武之人又安得携之至此今閱百餘年武邑之石又安所歸耶

拾遺魯國孔府君墓銘

咸通十五年鄭仁表楷書

金石補遺石在縣

文廟門前新出土

附

周亮工書影云郭公博榮澤榮陽尤多郭公不知何時人聞嘉靖元年撫軍命元百戶修月堤發一古

冢塋上有朱書曰郭公塋郭公墓郭公逢着元百戶
巡撫命爾修月堤臨時讓我三五步巡撫曰讓彼十
數步可也此塋昔以空心名後名琴塋今競呼爲郭
公塋矣

榮澤縣

唐重修漢忠烈侯紀公祠碑

長安二年范陽盧藏用撰并八分書
宇尚完好又明正統三年歐陽哲撰

密宅二州刺史鄭仁愷碑

景□□年崔融撰孫遵正書

歐陽進碑

顏真卿撰并書

禮部員外郎范陽盧鄩幼女姚婆墓志

大中七年正書

金石補遺碑在榮澤縣諸

生王瓊家新自土中掘出

宋檢校開國公程德玄神道碑

景德二年王坦書并篆額
石丈餘剝泐殆盡

至聖家廟碑

大中祥符二年留守王羽騰立

人不傳今止存設立奈
田及奉祀題名似碑陰

漢御史大夫周苛碑

蘇軾寫筆 本朝康熙二十五年主簿胡紹南立

明重修開國公程公墓祠碑

嘉靖十一年葉琰書

河陰縣

隋梁公堰紀功碑

寰宇記在河陰縣西二十里開皇七年
使梁容增修古堰過河入汴立碑紀功

唐光祿大夫鄭曾碑

開元二十四年

存唐碑記河陰城東北有碑屹然年久石泐概無全文拭而觀之尚顯
唐光祿大夫鄭曾大人李氏歸葬於陽北原數字餘皆斷殘不可讀

贈司空孔岑父碑

鄭繼撰如微書

贈司勳員外郎孔君墓誌銘

韓愈撰

昌黎文集孔君諱戡元和五年八月從葬河南河陰之廣武原

尚書左丞孔公墓銘

韓愈撰

昌黎文集公諱戡長慶二年八月葬河南河陰廣武原先公僕射墓之左

安定皇甫公墓銘

白居易撰

長慶集公諱鑄開成元年十月三日用大葬之禮歸全於河陰廣武原從太保府君先塋

汜水縣

漢成臯令任伯嗣碑

延熹五年

金石錄任伯嗣碑其首已殘缺碑在今汜水縣汜水在漢為成臯此碑蓋成臯令德政頌爾大觀初獲此碑輦置運司廨舍壁間余聞其陰有字因謁邑官

破壁出之遂得此本蓋漢碑有陰者十七八世多棄而不錄爾

晉潘岳父子墓碑

水經注潘水西北遇潘岳父子墓前有碑岳父范鄉郡太守碑石破落文字缺敗岳碑題云給事黃門侍郎潘君之碑碑云君遇孫秀之難閭門受禍故門生感覆以增慟乃樹碑以記事太常潘尼之辭也

北周龍泉寺碑

邑志宇文氏聚族於此有女為比丘尼建寺監碑週圍刻其官夫人某氏數十像皆後周顯官惜剝落不能備識

唐觀音寺方碣

武德五年陸德明撰今在王留村崇本寺駐廟

邑志秦王駐蹕廣武見大士

出見命陸德明立石紀其事

等慈寺碑

貞觀二年顏師古撰正音無姓名

集古錄寺在鄭州汜水唐太宗破王世充寶建德乃於其戰處建寺云為碑亡士為福唐初起兵破賊處多大抵皆造寺太宗英雄智識不世之主而率或習

俗猶不能免也

紀功碑

顯慶四年高宗撰並行書飛白題額

邑志高宗過鄭州見先聖謚實建德於虛緬想功業立碑為頌高二丈濶七尺厚二寸

幽栖寺浮圖銘

開元六年

邑令許勉燉云石僅尺幅今在多寶院宇蹟隸楷相間筆意近古而所書姓字不傳

明皇行次成臯詩

開元十三年史敭行書在紀功碑陰一作艾敭

令長新誠

玄宗製劉飛書

集古錄玄宗自擇縣今一百六十三人賜以丁寧之戒天下為縣者皆刻石余所得者六其一河內其二虞城其三不知所得之處其四汜水其五潁其六舞陽

虎牢關銘

在汜水縣西二里一名成臯亦曰古者關實至呂溫有銘

宋佛頂尊勝陀羅尼經幢

開寶九年僧慧貞書幢文八面在王留村觀音寺

神應王扁鵲廟記

政和甲午董作撰康修立書

按邑志廟建於漢鴻嘉三年隋仁壽中梁信繼修宋景祐元年重修政和中廟史黃文貴得石於河泥中乃隋時銘也董作立碑為記記內祇言得石於河泥之中却未及隋銘

印山東嶽廟壁記

金修伏犧廟碑

泰和五年石抹乾撰

元濟瀆廟碑

大德六年薛貴祖撰嚴君和書王元佐篆額

重修逍遙觀記

大德八年田道育書

顯靈王廟碑

張登書

明汜水教諭贈兵部職方司主事陳原墓表

景泰五年薛瑄撰

新修儒學記

成化三年劉昌撰

重修城隍廟記

加治十六年石琚撰楊惟善書潘子英篆額

附

許勉燉云余曾至等慈寺見石佛像大小數十錢鑿殊古柱礎大半墓銘蓋也上偏猶露唐宋字恨不能出之僅於頽垣下得斷幢二尺許及墓石二一題大唐故蘓君墓誌之銘一題唐故張府君夫人誌銘銘詞已不知其處因以三石歸邑署

中州金石攷卷一

男守謙校

中州金石攷卷二

北平黃叔璥玉圃輯

陳州府

淮寧縣

漢相王君造四縣邸碑

延熹二年

水經注陳縣城內有漢相王君造四縣邸碑文字剝落不可悉識其略曰惟茲陳國故曰淮陽郡云云清惠著聞爲百姓畏愛求賢養士千有餘人賜與田宅吏舍自損俸錢助之成邸五官掾西華陳騏等二百五人以延熹二年云云故其頌曰修德立功四縣同附今碑之左右遺墟尚存基礎猶在時人不復尋其碑經云孔子廟絕非也

溫令山可續碑

延熹四年

水經注潁水之北者漢溫令許續碑續字嗣公陳國人也塞賢良拜議郎遷溫令延熹中立

唐畫卦臺碑

李邕書

方于光畫卦臺記一統志稱為樸書臺路史註則稱為八卦壇前代名賢若李邕若張齊賢皆有碑記惜乎不傳

陳州龍興寺碑

景龍四年張說撰盧藏用八分書一作開元十四年

天雲寺講堂碑

太尉趙鼎祠堂記

流杯亭碑陰記

金石略唐陳州流杯亭碑陰記
光化中趙毅書毅昭宗時人

修伏羲廟碑

趙殿書

開元寺講堂記

盧中敏書

宋左班殿直楊君墓志銘

嘉祐二年王安石撰

葬冠縣縣友于鄉

厄臺銘 王禹偁撰

庭莎記 晏殊撰

立光武廟記 張耒撰

太昊伏羲氏五字 在墓前或云朱子書或云蘓子由書未詳 廟多名人

明修太昊陵廟記 成化七年戴鼎書

陳州學記 嘉靖初賈宏撰

先天圖石碣 嘉靖壬寅魏口本立

重修太昊陵廟記 萬歷四年吳國倫撰周鑑書

西華縣

宋法華禪院碑 皇祐二年

修商高宗廟碑

元祐六年王汾撰

項城縣

漢封觀碑

天下碑錄在

項城墓前

魏賈逵祠碑

魏列傳賈逵為豫州刺史吏民追思之刻石立祠青龍
中帝東征乘輦入逵祠詔曰亦見賈逵碑像念之愴然
水經注賈逵祠在小城東小城項
縣故城也廟前有碑埋石金生

梁鹿苑寺碑

通志在縣北五十里南頓
街梁武帝勅建有碑記

光武臺碑

南頓集濟源廟碑

宋南頓光武廟記

邑令江淳裕建張采書

按方輿紀要南頓城即今商水縣治春秋時
頓子國漢置南頓縣不知志何據入項城

附

金石志顏魯公碑未詳何文學宮碑記康熙三十
一年邑令顧芳宗集顏魯公書邑志縣西三十三里
有晉王臺乃唐李克用屯兵處古廟碑刻猶存今已
無可窺尋矣

沈邱縣

明創建沈邱縣記

弘治十四年程敏政撰張遇書

太康縣

唐贈太尉許國公神道碑

長慶三年韓愈撰

宋江鄰幾墓銘

嘉祐六年歐陽修撰

歐陽文忠公集君姓江氏開封陳留人也自漢轉陽侯德居於陳留之
國城君自高祖而上七世塋園南夏岡由大王父而下三世乃塋陽夏
嗜退養語存江鄰幾與公契分不疎晚著雜誌詆公尤力既死公往弔哭之慟
告其子曰先公埋石修當任其責矣敘銘無取詞讀其文者匪特見交情終始
且信所
詆不實

明修儒學記

成化六年吳寬撰

郭叅政墓表

正統戊辰邵寶撰

扶溝縣

漢國三老袁良碑

永建六年

集古錄碑云君諱良字口卿上一字磨滅陳國扶樂人也後云永建六年
二月卒其碑首題云漢故國三老袁君碑其餘雖可讀而不能次第也

金石錄鄆道元水經注扶溝城北有表梁碑云

梁陳國扶樂人事與碑合惟誤以良為梁爾

漢隸字源國三老表良碑在東京扶溝良以順帝末

建六年二月卒孫衡尉滂立此石天下緣良一作貢

按方輿紀要扶樂城在扶溝縣東南三十

里金石林時地考金石志載入太康縣

表騰碑

魏表渙碑

水經注渴水逕大扶城西之東北悉諸表舊墓碑字傾低虎羊碎折

惟司徒滂蜀郡太守騰博平令光碑字所存惟此自餘殆不可尋

邑志墓有石獸頂刻隸書銘云右天祿食教倉飲山谷太康志漢司徒滂御史

大夫渙晉河南尹尚書侃皆扶樂人去此甚近故其墓在焉今石獸存呂家潭

齊氏

宋

唐扶溝令馬光淑頌

開元二十九年

金石錄崔顥撰八

分書姓名殘扶

元城隍廟碑

潘英並撰

明修程明道祠記

景泰五年劉定之撰

附

邑志明弘治中邑人於謝處士墓前得唐人銘立石紀齡芳儀永謝一奄泉扉魂返夕夜

許州府

石梁縣

漢僕射荀公碑

按格古要論荀淑字季和為僕射墓碑在長社東北七里金石志載入江南潁州府學略述云季公郡間領陝則曰冀潁川荀淑碑吳則曰潁乃又列入許何也

河南尹蘓府君碑額

金石錄漢魏石君碑額題漢故河南尹憲府君碑今宜川太守張叔夜見寄云
在許州道旁碑無文詞惟此九字其額耳按東漢時魏氏未顯者惟韋嘗以
河南尹徵不就其他無尹河南者意其為韋碑也
然韋扶風平陵人而碑乃在許昌未知果是否

徐庶母碑

通志在州城東二十
五里徐庶母墓有碑

梁匡德軍節度使馮行襲德政碑

通志在州治前民舍中
其文剝落止存衆額

北齊造丈八大像頌

天統五年正書

金石續錄頌不知故在何處今為許昌關廟卑刀石字跡猶存
頌無撰書姓名題名自諸維那外皆署邑子而朱姓居十之九

赫連子悅清德頌

金石錄北史列傳子悅為鄭州刺史郡人請為立碑詔許之碑所載亦同而碑
乃在今許昌者按隋書地理志潁川郡舊置潁州東魏改曰鄭州後周改為許

州

唐許昌縣令廳壁記

貞元十九年白居易撰

佛頂尊勝幢

咸通六年李遇正書

金石補遺在許州

府南門內寺中

吳道子漢壽亭侯像

明萬歷二十七年李宗周刻石英采絕少殆是偽筆

通志州城西北吳道子洞孔聖像開帝像皆其手筆刻石見存

文宣王廟碑

盧匡書

高陽碑

金石志在許

州荀叔里

宋都官郎中王次仲墓銘

明道二年

歐陽文忠公集公諱世昌
葬許州長社縣白兔原

飛白寶章記

通志仁宗康定二年飛白文詞賜侍讀
李仁淑為記摹石州屏今在州北城上

充寶文閣待制韓宗道墓誌銘

曹華撰趙挺之書

金石續錄子開為文宋史稱其溫潤有法信
然挺之書全學皇甫碑宋書之具唐體者也

慶成軍使韓宗厚墓誌銘

朱光喬撰杜純書

金石續錄宗厚與宗道同祖韓氏宋時為中原巨族其塋墓在潁昌
府長社縣嘉禾鄉靈井里二墓順治間被掘銘在今韋家莊廟中

元知許州劉侯民愛碑

至大元年李永魯神撰

重修關王廟碑

至正壬辰青顏立石

明許州學記

弘治三年吳寬撰

重建陳太邱祠堂記

弘治六年呂璋撰

漢蔡孝子題詞

弘治十三年包裕撰

重修蔡孝子祠堂記

弘治十三年車爾撰

平江令宋鑑小傳碑

萬歷四十二年邵寶撰李莊書

附

志漢中郎將墓北逍遙山磨崖為碑字多剝落難

讀碑帖考顏庚書夏禹廟碑在陽翟

臨潁縣

魏公卿上尊號奏

黃初元年魏書相國飲太尉謂等上表今只存其半至為世後亂則致升平止下皆剝蝕

漢魏字源上尊號奏延康元年立在潁昌府集古錄

云唐賢多傳為梁鵠書今人謂鍾繇書未知孰是

銷夏記載此碑為梁鵠書歐陽公云嗚呼漢魏之事蹟其書者可為流涕也其鉅碑偉字其意惟恐傳之不遠也豈以後世為可欺歟何元則謂魏書當以

梁鵠爲第一是隸書之祖余謂不然漢隸雍容古雅卓然千古
梁鵠所書方削寡情矯強未達視史晨碑勅諸碑相去千里矣

隸辨額題云魏公卿將軍上尊號表九篆字爲二行字作陰文凸起碑式云先
王及高陵兩武王三陛下皆平潤有奕司級自陛下即位後刻於碑陰當時內
外前後勸進之辭不一此蓋刻其最後一章碑自造於華裔之後石理較剛字
跡晦昧今世所傳者多是前一段耳予見拓本於北海孫氏僅存數十字今在
許州者
重摹也

受禪碑 黃初元年隸書

水經注魏文帝以漢獻帝延康元年行至曲靈臺碑於是地改元黃初以頡陰
之繁陽亭爲繁昌縣城內有三臺時人謂之繁昌臺壇前有二碑者魏文帝禪
於此自壇而降曰舜禹之事吾知之矣故其石銘曰達於繁昌築靈臺也
於後其碑六字生金論者以爲司馬金行故曹氏六世遷魏而事晉也
銷夏記受禪碑余家有舊榻本無一字斷裂上有晉府圖書蓋宋時榻
也書法同勸進金石史云雖小遠漢人雍容雅度衫履自飭亦復矯矯
隸辨額題云魏受禪表四篆字爲一行作陰文凸起劉賈客嘉話云王朗文梁
鵠書鍾繇鑄字謂之三絕集古錄云顏真卿又以爲鍾繇書莫知孰是此碑舊
刻亦已殘缺今所傳者重摹
也集古錄作魏受禪壇記

唐贈和州刺史張敬因碑

大歷十四年顏真卿撰并書

集古錄碑在許州臨潁縣民田中慶歷中有知此碑者往模之民家思其踐田稼遂擊碎之余在滁陽遣人往求之得其殘缺者爲七段六其文不可次第獨其名氏存焉魯公之碑世所奇重此尤可珍寶也

演教院記

長慶時立

輿地碑目在

臨潁之北

修繁城廟記

咸通十二年

金石錄曾分象

撰書無姓名

明建漢愍帝碑

弘治口年邵寶撰

碑云古今纂竊之維首稱曹魏繁城有壇焉曰禪受皆謬誣之詞有廟焉以祠魏文南面帝服儼然臨之當其親爲纂竊之地而舍此與彼亂臣賊子將益無所顧忌宜易所祠以祠漢之愍帝而其臣孔融配焉帝不稱獻而稱愍從昭烈所諡漢之君非魏所得諡也

立宋將軍楊再興廟碑

萬歷九年王祖嫡撰
在小南橋

附

金石文字魏大饗碑羣臣上尊號奏及受禪石表
文並在許繁昌金石志大饗碑載入商邱扶溝江南
亳州陝西長安按魏文帝延康元年夏六月南征秋
七月甲午軍次于譙大饗六軍及父老立壇於故宅
壇前樹碑題云大饗之碑譙即今亳州州有大饗堂
則石在譙明矣近見謝古梅碑刻紀存列入亳州良
然王隆照云臨潁儒學有元加封孔子碑大楷書又
明邵寶修文廟碑弘治中立賈文靖公詠碑嚴嵩撰
文嘉靖十六年在縣南六里墓前尚有諭祭誥命十

餘碑

襄城縣

唐湛橋寺石像頌

金石續錄寺在邑東南三十里天寶九年比邱道文造天宮石像鵠頌其下頌駢體皆宗門語頗亦不惡書法朴茂時無分隸

宋重修令武廟碣

建隆元年毛口書

上柱國清河伯張錫墓銘

皇祐五年歐陽修撰

縉雲尉張仲倩墓銘

皇祐五年司馬光撰

范蜀公墓銘

元祐四年蘇軾撰

蘇文忠公集公諱鎮字景仁晚家於許元祐四年八月葬於汝之襄城縣汝安鄉推賢里

修孔廟記

大觀元年

金石續錄在學宮東廡下字
漣動而多姿亦宋碑之佳者

石刻容膝二字 朱子書

邑志道勳古蒼原在香港店舖順治
七年己未歲昌年移置靈泉山

金竹閣寺碑 元光二年雷淵撰陳仲謙八分書孔元楷篆額

金石續錄寺在三鄉之西仲謙書方整但少神韻耳全執題句修竹
何曾見一竿寺僧去盡寺門闕空餘一片元光石日對門前女几山

修孔子廟碑 正大丙戌

金石續錄碑在邑學宮東廡簷間李春嚴撰文
麻九疇題額趙聲書正大丙戌建字亦工穩

元重修令武廟記 大德元年馬份書

襄城縣學廡記 至大元年劉必大撰字米魯神書蕭與篆

穎考叔祠堂記 至大三年張思敬撰

襄城縣學記

至治元年字木魯辨撰溫迪罕給其書

明紫雲書院碑記

成化十七年到昌撰

判官辛君墓表

弘治八年邵寶撰高松書

郾城縣

漢文範先生陳仲弓碑

中平三年蔡邕撰并書

金石錄陳仲弓碑其額題云漢文範先生陳仲弓之碑字已漫滅蔡邕字書見於今者絕少故雖湯淑之餘尤為可惜以校集本不同者已數字惜其不完也按邕集仲弓三碑皆邕撰碑陰故吏姓名多已刊缺蔡邕小字八分惟此與石經遺字耳石經字畫謹嚴而此碑陰尤放逸可受隸辨金石錄與隸續俱不言碑之所在按蔡邕集載此碑云勒表墳墓則碑當在墓前一號志云陳實墓在郾城縣西三十里

司空掾陳君碑

中平五年蔡邕撰

隸辨額題云漢故司空掾陳君碑八篆字金石錄云碑已殘缺不可辨惟其首八大字尚完字畫奇偉隸續云此蔡中郎所作第三碑也其文乃陳牧復讚悲

傷之辭僅有前七十字下文盡皆不存碑作五年者豫牧立碑之年也趙氏謂是諸碑不知碑中自有太邱姓名其文又在蔡邕集蓋不能認碑故有所誤陳實傳不言為司空掾據此碑額題疑是史傳失載

漢魏碑刻紀存司空掾陳實

殘碑在郾城縣太邱墓側

鴻臚陳君碑

金石古文陳君碑卽子禮撰云君碑紀字元方太邱君之元子

唐潁州刺史高公德政碑

長慶口年王起撰裴璘書

方輿紀要唐建中二年置潁州州城卽今郾城縣治

宋彼岸寺篆碑

金石補遺彼岸寺石幢高丈餘下有石臺上有石蓋雕刻精緻共六面每面寬二尺餘獨北面書人姓名官銜及年月皆小八分書悉模糊不可識大殿後又有唐時小石幢書陀羅尼咒指書甚道健惜失其名

古石幢文義不全內有興國中三字極分明想與上
蔡彼所寺俱宋時所建來書甚佳惜摧殘太甚耳

元五老堂碑

延祐四年邑人徐季良為麻九疇張從正王子可張穀山堂老人立石條浩為記

明重修裴晉公祠二碑

一治七年邵寶立
一萬歷六年張簡記

修學記

劉理順撰

長葛縣

漢任子墓碑

通志在縣城東一
里有任子斷碑

晉議郎陳先生碑

墨池編元康
二年在長葛

尉氏令陳君碑

墨池編對氏今陳
君單碑在長葛

元魏敬史君顯儻碑

興和二年 正書碑陰刻故吏人名亦正書

右碑乾隆三年知縣許蓮峰於曉
離灣地中掘出敬史君名已剝泐

隋房彥謙碑

北史本傳房彥謙為長
葛令百姓立碑頌德

唐陳太邱祖德碑

天寶九載系孫兼撰序伍拱銘伍子肩書

元崔公去思碑

大德元年袁楠撰

趙侯德政碑

至正四年蕭口賢書
在縣署儀門外

明重修漢太傅卓君廟記

嘉靖壬辰王繼書

長葛縣題名記

萬歷四年薛故元撰

禹州

漢太尉郭禧碑

光和二年

金石錄漢郭禧碑文字殘缺所存才百許字郭氏世為陽翟人自將以下皆整陽翟今此碑缺處猶有陳留扶溝字疑禧嘗寓居是邑其卒也次葬故鄉而漢書注遂以為扶溝人恐誤碑陰首四大字云故吏人名其下列故吏故民凡百餘人又有右河南古河內郡右丞農郡右扶風字字盡完好者甚多筆法淳古可愛郭禧後碑殘尤甚其畧可辨者惟光祐二年夏五月甲寅大中大夫故太尉郭公襲又云公之子故五原太守餘不復應文而其額題漢故太尉郭公神道字

盡尚完云

漢魏碑刻紀存郭禧碑在禹州碑存上段字盡方勁淳古又有郭禧後碑並陰殘缺尤甚

司空祭酒郭奉孝碑

建安中立

水經注陽翟城西有郭奉孝碑水側有九山祠碑

晉九山廟府君碑

元康二年

水經注九山廟有碑云九顯靈府君考太華之元子陽九列名號曰九山府君也南據崧岳北帶洛瀍晉元康二年九月太歲庚午帝遣殿中中郎將關内侯樊廣縱氏令王與傳演奉宣詔命興立廟殿焉

唐善才寺碑

訪碑錄史
惟則分書

陽翟縣水亭記

大中九年魏庾撰蕭起行書

陽翟縣令壁記

元和十四年許堯佐撰吳宗冉書今在城北八里營碑剝落可辨者只四五十字

陽翟縣石橋記

崔周衡書

宋善才寺觀音院記

淳化元年梁文素書并篆下多剝落

天寧萬壽寺碣

仁宗御書天竺香解咀嚙字偈

參知政事戶部侍郎蔡公墓銘

范仲淹撰

范文正公集公諱齊字子思寶元二年四月薨贈兵部尚書諡曰文忠以康定二年卒已十一月某日薨於許州陽翟之茶山

太子右衛率府田紹芳墓銘 范仲淹撰

觀文殿大學士晏公神道碑 至和二年歐陽修撰

碑云至和二年正月公薨贈司空兼侍中諡曰元獻三月癸酉薨公於許州陽翟縣麥秀鄉之北原既薨賜其墓隧之碑首曰舊學之碑既又勅史臣修考次

公事具書於碑下

尚書刑部郎中孫甫墓銘 嘉祐五年歐陽修撰

歐陽文忠公集五年七月丁酉薨公為翟縣舊學鄉塢頭村之北原

太子太傅田公墓誌銘 嘉祐八年王安石撰

蔡文忠公神道碑 元豐五年張方平撰孫永書劉序篆額

碑下截剝損末書治平二年撰文元豐五年五月書篆

頽溪王亭記

范鎮撰

金鈞州重修文廟碑

大安三年趙銖撰任師古書
字跡殘損

明神后山神廟瑞獸碑

永樂三年周世子撰

重建漢黃太守廟碑

成化十八年吳節書

東嶽廟記

弘治辛酉馬文升撰耿裕書

如來雙跡靈相圖

弘治十七年僧通月摹

圖跋唐玄奘法師赴西域圖歸進呈太宗奉
勅刻石以廣其傳明通月命匠勒石八分書

白沙書院奉安二程先生神位告文

嘉靖十一年
廬陵劉魁撰

白沙書院記

嘉靖十二年張鯉撰任洛書

重修湯王廟記

嘉靖甲午李乘雲書

重修廟學記

嘉靖四十年黨以平書

穎濱書院碑

永昌元年侯恪撰董九貢書

附

石像小碣八分書未詳何代何人

密縣

唐風后八陣圖

獨孤及撰劉道源書元至正二十七年書

邑志縣東四十里風后講武處一石突起水環匝之石中巖洞高下十餘而號雲巖者高敞可廬洞中肖黃帝風后像有唐人獨孤及八陣圖乃元人重鐫非

唐舊

物也

宋法海寺石塔記

咸平四年張哲撰

金法海院德慈塔記

貞元二年劉文饒撰并書

修德觀問道碑記

劉文饒撰

白龍潭聖水感應碑記

承安四年

定遠大將軍劉芳墓碑

承安五年

元陽翟馮氏先塋碑記

趙孟頫書

叅知政事常公神道碑

元統三年

監縣明格公去思碑

至元三年霍復謙撰

明丈石崖大字

表宏道醉後書

附

邑志縣南里許有長官墓碑勒遺像一官一執印

一老嫗一虎惜字跡彫落不知所云梁佐索長官廟

記長官未知何代人昔宰是邑有惡獸入境為患公

選膽勇一人執牒而往追而投之獸啣牒自至訟庭

踞地而伏自是境不為患

新鄭縣

唐佛頂尊勝陀羅尼經幢

永淳元年次幅脫落下載在臥佛寺

修公孫僑廟碑

天寶十載刻書碑石斷裂字蹟殘損可辨者百十四字

滁州刺史榮陽鄭公墓銘

白居易撰

長慶集元和二年遷墓於鄭州新鄭縣某原附先秘齊望

宋太子太師陳文惠公神道碑

慶歷四年歐陽修撰

鄭夫人石柳銘

歐陽修撰

墓銘舉例宋歐陽修有母鄭夫人石柳銘石柳有銘又一例也書作柳之日而系以銘又一例也

旌賢崇梵院碣

皇祐三年歷大觀元年刻石在咸寧寺

牒稱右諫議大夫天章閣待制勾當三班院王子融奏臣亡兄曾於新鄭縣安葬墳側修到僧院已奉勅賜號崇梵院欲乞依呂奇簡等墳所僧院例每年撥放剃度行者勅每年並元節與剃度行者一名觀此明奄寺於墓所建梵宮窮極壯麗亦有所本也

旌賢崇梵院三賢堂贊

嘉祐四年劉敞撰

明成化十三年僧可鑑重鐫

歐陽文忠公墓銘

熙寧八年韓琦撰宋敏求書韓璣題蓋

敘云葬新鄭縣

旌賢鄉之原

寂默居士晁君墓表

元祐五年晁補之撰

宋文選葬鄭州新

鄭縣之旌賢鄉

歐陽文忠公神道碑

崇寧五年蘇轍撰

碑云先君不幸捐館舍亡兄與轍皆流落不偶元祐初會於京師公家以公碑謚子瞻許馬既又至於大故轍不敏以父兄故不敢復辭歐陽哲文忠公望石記正統三年哲至新鄭展敬坐下視其碑石決斷不堪立而文剝裂不可讀欲重刻之而未能公之事且諸史蘊之文行於世固不在於

碑也乃就工鑿石為小碑立於墓

前題曰宋太師歐陽文忠公之墓

醉翁亭記

蘇軾書明高拱刻今在邱陵劉氏家

弇州山人葉新鄭公家藏蘇軾醉翁亭記今刻之石結法道美氣韻生動極有
旭素屋漏痕意第不類蘇長公性渴筆一二得似耳豈公沒後王還老筆耶或
陸務觀張溫
甫輩戲筆耶

石墨鐫華比新鄭公得之微發邱者文詩永摹刻故能縱橫自如字字不失其
態余蓄此帖亦時展玩其中無一筆類長公者至法雖不能盡脫宋習那勝長
公何不自顯姓名而
署長公殆不可曉

金興福院重修大殿三門記

正隆元年僧福崇書
在臥佛寺

元許文正公祠堂二碑

大德八年
又至大二年鄭冲霄撰呂士文書

志古堂記

宋尹洙撰

元文類河南劉伯壽率新
鄭之二年刻於堂以自傲

明重修許魯齋先生祠記 薛瑄撰

魯齋遠書新鄭大隗山之左里曰陽緩元魯齋先生所生之地也先生世家河內金季其先人避兵是邑先生生於里中金大安己巳歲也縣學有祠以祀先生其事具碑今

碑存而祠廢

邑志元祠人廢明宣德年間知縣陳斐修學得石碑係公門人新鄭尹鄭冲霄記先生行實甚詳遂建祠肖像成化重修薛瑄為記

重修歐陽文忠公祠墓記 嘉靖三十二年皇甫思書

重修鄭大夫子產祠碑 萬歷二年高拱撰

附考古圖秦雙魚洗得於新鄭形制與四錢大洗同而差小皆有宜子孫三字旁有雙魚為飾邑志周太祖陵前舊有石刻云周天子平生好儉約遺令用紙衣瓦棺嗣天子不敢違也今亡

中州金石攷卷二

男守謙校